

Broj: 07-02-4-1245/22  
Mostar, 12.07.2022. godine

Primijeno: 19-07-2022			
Org. jelu	Broj	Priloga	Vrijednost
05/1	-02-	219	122

**BOSNA I HERCEGOVINA**  
**FEDERACIJA BOSNE I HERCEGOVINE**  
Predstavnički dom Parlamenta Federacije Bosne i Hercegovine

n/r: gđa Elma Đogić, poslanica u Predstavničkom domu Parlamenta FBiH  
gđin Ivan Miličević, sekretar Predstavničkog doma Parlamenta FBiH  
gđa Edita Kalajdžić, sekretar Vlade Federacije BiH

**PREDMET:** Odgovor na poslaničko pitanje; **dostavlja se-**

Dopisom Vlade Federacije Bosne i Hercegovine, broj: 03-04-858-3/2022 od 01.07.2022. godine, Federalnom ministarstvu energije, rudarstva i industrije, dostavljeno je poslaničko pitanje sa 34. redovne sjednice Predstavničkog doma Parlamenta Federacije Bosne i Hercegovine, održane 28.06.2022. godine.

Na navedenoj sjednici Predstavničkog doma Parlamenta Federacije Bosne i Hercegovine, uvažena poslanica Elma Đogić uputila je pitanja Vladi FBiH:

1. **Koliko Odluka o finansijskoj konsolidaciji privrednih društava sa većinskim učešćem državnog kapitala i za koja društva je donijela Vlada FBiH nakon stupanja na snagu Zakona o finansijskoj konsolidaciji privrednih društava u FBiH?**
2. **Koliko Odluka o finansijskoj konsolidaciji privrednih društava sa većinskim učešćem državnog kapitala i za koja društva su donijele Skupštine kantona nakon stupanja na snagu Zakona o finansijskoj konsolidaciji privrednih društava u FBiH?**
3. **Koliko Odluka o finansijskoj konsolidaciji privrednih društava sa većinskim učešćem državnog kapitala i za koja društva su donijela općinska/gradska vijeća u Federaciji BiH nakon stupanja na snagu Zakona o finansijskoj konsolidaciji privrednih društava u FBiH?**
4. **Koliko Odluka o završetku postupka finansijske konsolidacije privrednih društava sa većinskim učešćem državnog kapitala je donijela Vlada FBiH?**
5. **Za koja privredna društva i koliko stečajnih postupaka u skladu sa odredbama Zakona o stečajnom postupku je pokrenuto nakon okončanja postupka finansijske konsolidacije?**

Na osnovu člana IV.B.7.f) (VI) Ustava Federacije Bosne i Hercegovine i člana 75. Poslovnika o radu Vlade Federacije Bosne i Hercegovine – Prečišćeni tekst („Službene novine Federacije BiH“, br. 6/10, 37/10, 62/10, 39/20 i 67/21), Federalno ministarstvo, energije, rudarstva i industrije dostavlja sljedeći:

### Odgovor na poslaničko pitanje:

Zakon o finansijskoj konsolidaciji privrednih društava u Federaciji Bosne i Hercegovine (u daljem tekstu Zakon), proglašen je Ukazom predsjednika Federacije Bosne i Hercegovine, broj: 01-02-507-02/14 od 24.06.2014. godine, objavljen je dana 02.07.2014. godine („Službene novine Federacije BiH“, broj 52/14) i u skladu sa članom 19. Zakona stupio je na snagu osmog dana od dana objavljivanja u „Službenim novinama Federacije BiH“, odnosno 10.06.2014. godine.

U međuvremenu, Zakon je pretrpio tri izmjene, i to:

- 2018. godine, donesen je Zakon o izmjeni Zakon o finansijskoj konsolidaciji privrednih društava u Federaciji Bosne i Hercegovine („Službene novine Federacije BiH“, broj 36/18),
- 2019. godine, donesen je Zakon o izmjenama Zakon o finansijskoj konsolidaciji privrednih društava u Federaciji Bosne i Hercegovine („Službene novine Federacije BiH“, broj 54/19),
- 2021. godine, donešen je Zakon o izmjenama Zakon o finansijskoj konsolidaciji privrednih društava u Federaciji Bosne i Hercegovine („Službene novine Federacije BiH“, broj 48/21).

Izmjene zakona donesne su na temelju analize –Informacija o realizaciji Odluka o finansijskoj konsolidaciji privrednih društava u Federaciji Bosne i Hercegovine, imajući u vidu da je Zakon temporalnog karaktera, odnosno da se započeti postupci finansijske konsolidacije trebaju okončati do 31.12.2021. godine i da su privredna društva zahtjeve za odobravanjem ovih postupaka mogla podnositi do 08.02.2020. godine. Cilj Zakona je da se otklone prepreke na realizaciji Odluka o finansijskoj konsolidaciji privrednih društava, te da se omogući da privredna društva u roku od dodatne dvije godine, odnosno do 31.12.2023. godine, izvrše sve aktivnosti vezane za primjenu Zakona o finansijskoj konsolidaciji privrednih društava u Federaciji Bosne i Hercegovine, kao i da se omogući drugim privrednim društvima koja posluju sa poteškoćama da u roku do 31.12.2022. godine, mogu podnijeti zahtjeve za odobravanje postupka finansijske konsolidacije, kao i druge izmjene koje će pomoći realizaciji Zakona.

Također, uvažavajući stanje ukupne privrede, za vrijeme i poslije proglašenju stanja nesreće uzrokovane pojavom koronavirusa (COVID-19), donošenje Zakona o izmjenama Zakona o finansijskoj konsolidaciji privrednih društava u Federaciji Bosne i Hercegovine, omogućavalo je privrednim društvima da lakše prevaziđu nastale probleme u poslovanju.

U skladu sa posljednim izmjenama Zakona, Federalno ministarstvo energije, rudarstva i industrije je, zaprimilo zahtjeve privrednih društava na osnovu kojih je Vlada Federacije Bosne i Hercegovine donijela pet Odluka o finansijskoj konsolidaciji privrednih društava u Federaciji Bosne i Hercegovine (u daljem tekstu Odluke), i to:

1. „ZRAK“ d.d. Sarajevo,
2. Konfekcija „BORAC“ d.d. Travnik,
3. „BNT-TMiH“ d.d. Novi Travnik,
4. „BINAS“ d.d. Bugojno,
5. „ALUMINIJ“ d.d. Mostar.

Odluke za četiri privredna društva: ZRAK“ d.d. Sarajevo, Konfekcija „BORAC“ d.d. Travnik, „BNT-TMiH“ d.d. Novi Travnik i „ALUMINIJ“ d.d. Mostar su objavljene dana

22.12.2021. godine („Službene novine Federacije BiH“, broj 103/21), dok je Odluka za jedno privredno društvo „BINAS“ d.d. Bugojno, objavljena dana 31.12.2021. godine („Službene novine Federacije BiH“, broj 106/21).

Odluke su stupile na snagu narednog dana od dana objavljivanja i njihovom objavom su prestale da važe ranije donesene Odluke. Nakon završetka postupka koji je cilj predmetnih odluka, Vladi Federacije Bosne i Hercegovine će biti predložene adekvatne odluke o završetku započetog postupka finansijske konsolidacije.

Odluke za četiri privredna društva: ZRAK“ d.d. Sarajevo, Konfekcija „BORAC“ d.d. Travnik, „BNT-TMiH“ d.d. Novi Travnik i „BINAS“ d.d. Bugojno su donesene na osnovu člana 8. stav (1) i (3) Zakona i odnose se na društva sa većinskim učešćem državnog kapitala, dok je Odluka za jedno privredno društvo, „ALUMINIJ“ d.d. Mostar, donesena na osnovu člana 11. stav (1) i (3) i odnosi se na društvo sa učešćem državnog kapitala ili društva sa 100% učešćem privatnog kapitala.

Federalno ministarstvo energije, rudarstva i industrije nije zaprimilo obavijesti od strane Skupština kantona niti od strane općinskih/gradskih vijeća o donesenim Odlukama o finansijskoj konsolidaciji privrednih društava.

S poštovanjem,

**Dostavljeno:**

- naslovu,
- evidenciji,
- a/a

